



Republika Kosova – Republic of Kosovo

ORGANI SHQYRTUES I PROKURIMIT
TELO ZA RAZMATRANJE NABAVKE
PROCUREMENT REVIEW BODY

PSH. nr. 47/17

PANELI SHQYRTUES I PROKURIMIT PUBLIK i emëruar nga kryetari në bazë të nenit 105 pika 1 dhe 2 si dhe nenit 106 të Ligjit Nr. 04/L-042 për Prokurimin Publik të Republikës së Kosovës, i ndryshuar dhe plotësuar me ligjin Nr. 04/L-237, ligjin Nr. 05/L-068 dhe ligjin Nr. 05/L-092, si dhe nenit 28 paragrafi 1 të Rregullores së Punës së OSHP-së, në përbërje Ekrem Salihu –Kryetar, duke vendosur sipas ankesës me nr. të protokollit 47/17, të parashtruar nga operatori ekonomik “ALBKOS INTERNATIONAL” me seli në Fushë Kosovë, lidhur me aktivitetin e prokurimit me titull: “Furnizimi me pajisje të aksidenteve të komunikacionit rrugor për nevojat e zjarrfikësve”, me nr. të prokurimit 651/16/074/121, të shpallur nga autoriteti kontraktues– Komuna e Gjilanit, në seancën e dt. 05 prill 2017, mori këtë:

V E N D I M

- I. **Aprovohet**, si e bazuar ankesa e operatorit ekonomik “ALBKOS INTERNATIONAL” me seli në Fushë Kosovë, lidhur me aktivitetin e prokurimit “Furnizimi me pajisje të aksidenteve të komunikacionit rrugor për nevojat e zjarrfikësve”, me nr. të prokurimit 651/16/074/121, të shpallur nga autoriteti kontraktues– Komuna e Gjilanit.
- II. **Mbetet në fuqi**, vendimi i autoritetit kontraktues-Komunës së Gjilanit, njoftimi për dhënie të kontratës, lidhur me aktivitetin e prokurimit me titull: “Furnizimi me pajisje të aksidenteve të komunikacionit rrugor për nevojat e zjarrfikësve”, me nr. të prokurimit 651/16/074/121, duke e pasur parasysh se OSHP-ja ankesën e ka pranuar pas nënshkrimit dhe implementimit të kontratës.
- III. Operatori ekonomik ankues “ALBKOS INTERNATIONAL” me seli në Fushë Kosovë, rekomandohet që për dëmshpërblim eventual të dëmit ti drejtohet gjykatës kompetente.
- IV. Mos respektimi i këtij vendimi, detyron Panelin Shqyrtues që konform dispozitave ligjore të nenit 131 të LPP-së nr. 04/L-042, të ndërmarr masa ndaj Autoritetit Kontraktues, që nuk respekton vendimin e Panelit Shqyrtues të paraparë me këtë ligj.

V. Operatorit ekonomik ankues “ALBKOS INTERNATIONAL” me seli në Fushë Kosovë, konform nenit 118 pika 3, i kthehen tarifa e sigurimit të ankesës.

VI. Urdhërohen, OE ankues që konform nenit 36 pika 5 të Rregullores së Punës të OSHP-së, në afat prej gjashtëdhjetë (60) ditësh të bëjë kërkesë për kthim të sigurimit të ankesës, në të kundërtën i bëhet konfiskimi i depozitës, dhe këto mjete kalojnë në Buxhetin e Republikës së Kosovës.

ARSYETIM

Autoriteti Kontraktues – Komuna e Gjilanit, më dt. 15 nëntor 2016, ka publikuar *Njoftim për kontratë* lidhur me aktivitetin e prokurimit me titull: **“Furnizimi me pajisje të aksidenteve të komunikacionit rrugor për nevojat e zjarrfikësve”**, me nr. të prokurimit 651/16/074/121.

Si kriter për dhënie të kontratës ka qenë Tenderi i përgjegjshëm me çmim më të ulët.

Për këtë aktivitet të prokurimit kanë ofertuar 3 (tre) operator ekonomik.

Pikat e ankesës:

Pala ankuese pretendon se autoriteti kontraktues Komuna e Gjilanit, gjatë procesit të vlerësimit të ofertave ka bërë shkelje të nenit 7, nenit 53 nenit 54 dhe nenit 59 të LPP-së.

Ankesa e operatorit ekonomik është e afatëshme dhe është parashtruar nga ana e personit kompetent.

Ankesa është e bazuar.

Organi Shqyrtues i Prokurimit pas pranimit të ankesës, në bazë të nenit 113 dhe 114 të Ligjit Nr. 04/L-042 për Prokurimin Publik të Republikës së Kosovës, i ndryshuar dhe plotësuar me ligjin Nr. 04/L-237, ligjin Nr. 05/L-068 dhe ligjin Nr. 05/L-092, me datën 07 mars 2017, ka autorizuar ekspertin shqyrtues për të shqyrtuar vlefshmërinë e të gjitha pretendimeve të palës ankimore.

Eksperti shqyrtues, me datën 15 mars 2017, i dorëzon panelit shqyrtues raportin e ekspertizës, ku në raport sqaron, pas pranimit të ankesës se operatorit ekonomik ankues “Albkos”, OSHP-ja ka lëshuar vendimin për pezullim të këtij aktiviteti të prokurimit. Me datën 16 shkurt 2017, autoriteti kontraktues ka pranuar vendimin në fjalë, për të cilin sipas dispozitave të LPP-se, autoriteti kontraktues ka qenë i obliguar ta zbatojë dhe të sjellë në OSHP ofertat e operatorëve ekonomik pjesëmarrës në këtë aktivitet të prokurimit dhe dokumentacionin tjetër në lidhje me këtë aktivitet të prokurimit.

Autoriteti kontraktues – Komuna e Gjilanit, me datën: 20 shkurt 2017, ka dërguar një shkresë – Njoftim, përmes email-it, në të cilin ka dhënë arsyetimin e pamundësisë së zbatimit të vendimit të pezullimit me nr. 47/17 për aktivitetin e prokurimit: **“Furnizim me pajisje të aksidenteve të komunikacionit rrugor për nevojat e zjarrfikësve”**, me numër të prokurimit GL651/16/074/121.

Ne njoftimin e lartpërmendur autoriteti kontraktues, deklaroi se kontrata në fjalë është nënshkruar me datën: 04 janar 2017 me OE "Pastor Kosova" dhe po ashtu ka dhënë edhe arsyetimin e mos dërgimit të letrës standarde, siç u përmend edhe me lart.

Eksperti shqyrtues, sqaron se me vet faktin që autoriteti kontraktues nuk i ka dërguar letrën standarde operatorit ekonomik ankues, i ka mohuar të drejtën e operatorit ekonomik për të ushtruar të drejtat e tij ligjore dhe njëherit sqaroi se operatori ekonomik ankues ka parashtruar kërkesë për rishqyrtim pranë AK-së dhe nuk ka përgjigje-vendim të AK-së në lidhje me kërkesën për rishqyrtim.

Po ashtu, eksperti shqyrtues sqaron se autoriteti kontraktues, nuk i ka sjellë ofertat dhe dokumentacionin tjetër përcjellës në OSHP, sipas vendimit për pezullim të aktivitetit të prokurimit. Prandaj, duke u bazuar në shkeljet e lartpërmendura, eksperti shqyrtues, sqaron se ky aktivitet i prokurimit

Bazuar në atë që u tha më lartë, eksperti shqyrtues i rekomandon panelit shqyrtues që ta anulojë vendimin e AK-së për dhënie të kontratës dhe propozon që ky aktivitet i prokurimit të Rivlerësohet dhe njëherit i propozon që ankesa e operatorit ekonomik ankues të aprovohet si e bazuar.

Me rastin e procedurës para këtij organi u prezantuan provat duke e bërë kontrollimin dhe analizën e materialit të këtij aktiviteti të prokurimit i cili përbëhet: nga autorizimi i këtij aktiviteti, njoftimi për kontratë, procesverbali mbi hapjen e ofertave, ankesa e operatorit ekonomik ankues, raporti i ekspertit shqyrtues i dt. 15 mars 2017, si dhe parashtrësën e autoritetit kontraktues mbi raportin e ekspertit shqyrtues.

Autoriteti kontraktues Komuna e Gjilanit, përmes parashtrësës me shkrim të dt. 16 mars 2017, e njoftoi panelin shqyrtues se nuk pajtohet me mendimin e ekspertit shqyrtues të dhënë në raportin e ekspertizës së dt. 15 mars 2017, duke cekur edhe arsyet e mospajtimit me këtë raport.

Paneli shqyrtues bazuar në raportin e realizimit të kontratës për tenderin: **"Furnizim me pajisje të aksidenteve të komunikacionit rrugor për nevoja të zjarrfikësve"**, të dt. 10 mars 2017, lëshuar nga Shaip Ismaili- Komandant i NjPZSh, Komisioni për pranimin e pajisje Hidraulike për Aksidente të Komunikacionit Rrugor, si dhe faturën e lëshuar nga kontraktori-OE "PASTOR KOSOVA", konstatoi se autoriteti kontraktues për këtë aktivitet të prokurimit ka nënshkruar kontratë dhe furnizimi me pajisje është realizuar në harmoni me ofertën e ofruar në tender.

Pretendimi i operatorit ekonomik ankues ku thuhet se autoriteti kontraktues nuk ka respektuar nenin 54 të LPP-së, paneli shqyrtues bazuar në të gjeturat e ekspertit shqyrtues sqaron se qëndron pretendimi i operatorit ekonomik ankues, për arsye se autoriteti kontraktues ka qenë i obliguar që konform nenit 54 paragrafi 1 të LPP-së, të njoftoj menjëherë operatorin ekonomik ankues me letrë standarde mbi arsyet e eliminimit nga pjesëmarrja e mëtutjeshme nga aktiviteti i prokurimit, e jo siç ka vepruar në rastin konkret duke dhënë arsyetim se *"për shkak të mbi ngarkesës së e-mailit"*. Poashtu paneli shqyrtues konstatoi se parashtruesi i ankesës nuk është njoftuar mbi rezultatet e vleresimit të ofertave fare,

rrjedhimishte ka parashtruar kerkese per rishqyrtim pranë AK- Komuna Gjilan, ndersa AK, ne kundershtim me nenin 108/A, te LPP-se ne fuqi dhe ne kundershtim me nenin 8, te rregullave per paraqitje te kerkeses per rishqyrtim pran AK-se, legjislacion dytesor i nxjerrur nga KRPP, respektivisht zyrtari pergjegjes i prokurimit, nuk e ka respektuar paragrafin 2, te nenit 8, ku shprehimisht thuhet se vendimi i AK-se, eshte i detyrueshem , duhet te jete i arsyetuar dhe duhet ti komunikohet me shkrim parashtruesit te ankeses dhe te gjitha paleve te interesuara.

Paneli shqyrtues me rastin e vendimmarrjes pati parasysh që edhe pse pretendimet ankimore janë të bazuara, megjithatë në këtë fazë vendosi që vendimin e autoritetit kontraktues ta lë në fuqi, pasi që kontrata për këtë aktivitet të prokurimit është e nënshkruar dhe e njehta është e implementuar në tërësi, edhe pse autoriteti kontraktues ka bërë shkelje të rënda të dispozitave të LPP-së.

Paneli shqyrtues pas shqyrtimit të shkresave të lëndës, dosjes se tenderit, konstatimeve të cekura në ekspertizën e ekspertit shqyrtues, shqyrtimit të pikave pretenduese të operatorit ekonomik ankues, parashtrësën e autoriteti kontraktues të dt. 16 mars 2017, si dhe duke pasur parasysh faktin se kontrata lidhur me aktivitetin e prokurimit **“Furnizim me pajisje të aksidenteve të komunikacionit rrugor për nevoja të zjarrfikësve”** është nënshkruar dhe furnizimi me pajisje është realizuar, konstatoj se operatori ekonomik ankues në rastin konkret për dëmin e pretenduar - shkaktuar nga ana e autoritetit kontraktues për mos respektim të dispozitave të LPP-së, ti drejtohet organeve kompetente.

Paneli shqyrtues nga provat e prezantuara më lart, konform nenit: 117 të LPP-së, vendosi si në dispozitiv të këtij vendim.

KSHILLA JURIDIKE :

Kundër këtij vendimi nuk është e lejuar ankesa,
por pala e pakënaqur me kërkesëpadi mund t'i drejtohet
Gjykatës Themelore-Departamentit për Çështje Administrative
për kompensim dëmi ne afat prej 30 ditësh nga data e pranimi të vendimit .

Kryesuesi i Panelit Shqyrtues

Ekrem Salihu

Vendimi t'i dorëzohet:

- 1x1 ekzemplar – OE “ALBKOS INTERNATIONAL” sh.p.k. Fushë Kosovë
- 1x1 ekzemplar - AK- Komuna e Gjilanit
- 1x1 ekzemplar – Arkivës së OSHP-së

